

NotatDato: 08.07.2016
Arkivsak: 2016/5067-2
Saksbehandlar: monsera

Til:	Eva Katrine Taule
Frå:	Monika Cecylia Serafinska, Inger Lena Gåsemyr

Kulturminnefagleg innspel - framlegg til planstrategi og planprogram for kommuneplanen sin samfunnsdel - Lindås kommune

Hordaland fylkeskommune har vurdert saka som regional styresmakt for kulturminnevern.

Om kulturminne og kulturmiljø

Kulturminne og kulturmiljø er ein ikkje-fornybar ressurs som skal vernast i ein heilskapleg miljø- og ressursforvaltning. Det er viktig at kulturminne vert ein integrert del av dei overordna planane i kommunen. Kulturminne er både ein ressurs som må sikrast og eit satsingsområde. Kulturminne kan brukast konstruktivt også i arbeidet med å nå andre målsettingar slik som folkehelse, kulturarbeid og utvikling av lokal identitet.

Kommunal kulturminneforvaltning

Omsynet til kulturminne skal sikrast i all lokal, regional og nasjonal utvikling og arealplanlegging. Hordaland fylkeskommune har kjennskap til Lindås kommune sin kulturminneplan. Kommunane har hovudansvaret for å identifisere, verdsetje og forvalte verneverdige kulturminne. Kulturminneplanen bør difor reviderast i tråd med nasjonale mål, jf. dei *Nasjonale forventningane til kommunal og regional planlegging* frå 12.06.2015. Fylkeskommunen har ansvar for å sørge for dei nasjonale kulturminneinteressene og støtte kommunane med rettleiing.

I brevet frå Riksantikvaren datert 19.12.2014, vert fylkeskommunen og kommunen invitert til eit samarbeid for å styrke kommunal kulturminnekompetanse. God forvaltning av kulturminner krev kompetanse, innsikt i lokalhistoria og kunnskap om kulturminne. Lindås kommune manglar diverre gode oversikter over verneverdige kulturminne. I høve til dei nasjonale forventningane til kommunal og regional planlegging har Lindås kommune fått hovudansvaret for å identifisere, verdsetje og forvalte verneverdige kulturminne i kommunen. Fylkeskommunen har ansvar for å sørge for dei nasjonale kulturminneinteressene og støtte kommunane med rettleiing. Gjeldande kulturminneplan treng difor ein revisjon, då denne planen berre set fokus på kulturminne i kommunal eige. Kulturminneplanen bør mellom anna ha eit oppdatert register/liste over dei kulturminna kommunen vurderer å ha kulturhistorisk verdi og skal bevarast og forvaltast særskilt.

Kulturminneforvaltinga skal ha tilgang til desse data. Nærare informasjon om korleis data skal forvaltast, finn ein her: <http://www.riksantikvaren.no/Veiledning/Data-og-tjenester/Askeladden/Veiledninger>

Hordaland fylkeskommune arbeider elles aktivt for å auke kulturminnekompetansen i fylket gjennom prosjektet «Kulturminneplanar i kommunane, KIK»,
<http://www.hordaland.no/nn-NO/kultur/kulturminnevern-og-museum/kulturminneplanar-i-kommunane---kik/>

I handsaming av tilskotsmidlar til kulturminne legg Hordaland fylkeskommune og Kulturminnefondet vekt på om kulturminne er prioritert i kommunale kulturminneplanar. Kulturminneplaner er difor viktig for at eigarar av verneverdige kulturminne i kommunen skal bli prioritert i tildeling av tilskot.

Innspel til planprogrammet

Samfunnsdelen skal vere med på å definere og formidle kommunen sin identitet og kva retning kommunen ynskjer å gå. Kulturminna i Lindås kommune er ei rik kjelde til identitet og byrgskap, og vil difor vere ein viktig ressurs i dette arbeidet. Kulturminna er òg kjelde til næring og utvikling lokalt og regionalt. I regional kulturplan PREMISS: KULTUR vert den estetiske forminga og forvaltinga av bygningar, omgjevnader og landskap tematisert, likeeins samanhangen mellom kulturminne, landskap og ny arkitektur og tydinga for lokal, regional og nasjonal identitetsskaping.»

Lindås kommune skildrar ti utviklingstrekk og hovudutfordringar for kommunen i kapitel 7. Kulturminne er tatt med under punkt «7.9. Kultur, idrett og fritid». Her har kommunen peikt på at kulturminne og kulturmiljø er å rekne som samfunnet sine felles verdiar og ressurs for nolevande og framtidige generasjonar i Lindås. Kommunen vil satse på lokale for å ta vare på kulturminne i kommunen og byggje opp identiteten til innbyggjarane, noko som er viktig for å ha levande bygder og god stadutvikling. Dette er viktig, men perspektivet kunne med fordel vore utvida. Kulturminna i Lindås bør òg sjåast som ein helsefremjande faktor, då dei er viktige for alle generasjonar si sjølvforståing, trivsel og verksemd. Folkebiblioteket er ein viktig møteplass for overføring av kunnskap om kulturminne. Gjeldande kulturminneplan bør reviderast og integrerast betre i den kommunale samfunnsplanlegginga.